

Urden disciplinar

per la scola da la citad da Cuira



Stadt Chur

Art. 1 Intent

- ¹ L'urden disciplinar gida a garantir ensemen cun l'urden da chasa in manaschi da scola reglà.
- ² El reglescha las cumpetenzas da las autoritads da scola e da las persunas d'instrucziun sco er il proceder en cas da surpassaments da scolaras e scolars cunter la disciplina en scola.

Art. 2 Valaivladad

L'urden disciplinar vala per tut las scolaras e tut ils scolars da la scola da la citad da Cuira.

Art. 3 Disciplina en scola

- ¹ Las scolaras ed ils scolars han da sa cuntegnair plain resguard in tranter l'auter ed envers creschids.
- ² Els han d'observar las directivas da persunas d'instrucziun, autoritads da scola e personal da scola.
- ³ Els han da sa tegnair exactamain vi dal temp da scola.
- ⁴ Els ston purtar vestgadira adequata ed adattada a la situaziun da scola correspundenta (instrucziun usitada, gimnastica e sport, lavurs manualas, economia da chasa, etc.).
- ⁵ Els han da tralasar tut quai che disturba il manaschi da scola.

Art. 4 Localitads, mobigliar, apparats, material da scola

Las scolaras ed ils scolars han dad avair quità dals implants, dal mobigliar, dals apparats e dal material da scola.

Art. 5 Infrastructura IT, telefonins

- ¹ L'infrastructura IT da la scola da la citad serva a la realisaziun dad incumbensas da scola. La manipulaziun da la hardware u software da computer ed il download e la derasaziun da cuntegns che cuntrafan a la lescha èn scumandads. Las directivas dad IT per scolaras e scolars da la scola da la citad vegnan resguardadas a moda severa.
- ² Il diever privat da telefonins ed auters apparats electronics durant l'instrucziun è scumandà. Las persunas d'instrucziun han il dretg da pretender ch'ils apparats vegnian mess giu u als pon schizunt confiscar durant l'instrucziun. Medemamain èsi scumandà da filmar e fotografar sin l'areal da scola.
- ³ En cas d'in diever privat abusiv da l'internet u d'autras medias d'infurmaziun e comunicaziun (p.ex. social media e.a.) cunter scolaras e scolars sco era cunter collavuradors da la scola da la citad vegn la direcziun da la scola a prender tut las mesiras per proteger las persunas numnadas sura. Quai cumpiglia er accusaziuns penals tar la polizia.

Art. 6 Products da giudiment e drogas

Il consum e possess dad alcohol, products da tubac (incl. e-cigarettas) e drogas da tut gener èn scumandads per scolaras e scolars sin l'areal da scola ed a chaschun d'occurrenz da scola.

Art. 7 Armas, auters objects

- ¹ Tut ils tips dad armas, imitaziuns dad armas ed auters objects malsegirs (p.ex. punctaders da laser e chaussas sumegliantas) èn scumandads sin l'areal da scola ed a chaschun d'occurrenz da scola.
- ² La direcziun da la scola ed il manader da scola pon extender quest scumond sin auters objects ed apparats che disturban il manaschi da scola.
- ³ Las persunas d'instrucziun pon confiscar transitoricamain tals objects ed apparats. Per sclerir la relevanza penala pon objects confiscads vegnir surdads a la polizia; ils ulteriurs èn da tegnair a disposiziun per returnar als responsabels per l'educaziun.

Art. 8 Chastis disciplinars tras la scola da la citad

- ¹ Surpassaments cunter l'urden disciplinar vegnan punidas tut tenor grevezza cun renviament, chastis ch'èn da far a chasa u en scola, lavurs spezialas u cun in'exclusiun da la classa limitada temporalmain. In'exclusiun da la classa signifitga che la scolara u il scolar ha da visitar l'instrucziun en in'otra classa u en in'otra chasa da scola.
- ² Chastis ch'èn da far en chasa da scola e lavurs spezialas ston succeder sut surveglianza. Els duain sche pussaivel star en connex cun il gener dal surpassament disciplinar.
- ³ La durada maximala per chastis ch'èn da far en chasa da scola e per lavurs spezialas importa diesch mezs dis per surpassament. L'execuziun dal chastis po era succeder durant las vacanzas da scola.

Art. 9 Exclusiun da la scola

In'exclusiun da la scola sa drizza tenor las disposiziuns chantunalas da la lescha da scola (art. 55).

Art. 10 Constataziun dals fatgs, uvida giuridica

¹ Il gener e las circumstanzas dal surpassament disciplinar ston vegnir sclerids. Las scolaras ed ils scolars participads ston vegnir tadlads.

² En cas, nua ch'igl è vegni ordinà lavur speziala u in'exclusiun da la classa da dapli che dus mezs dis ston ils responsabels per l'educaziun vegnir infurmads ordavant da la persuna d'instrucziun u dal manader da scola. Sin dumonda èsi da communitgar ad els la decisiun en scrit e cun inditgar ils motivs.

Art. 11 Cumpetenzas

¹ Ils chastis disciplinars vegnan ordinads da las persunas d'instrucziun, dal manader da scola u da la direcziun da la scola.

² Las persunas d'instrucziun pon dar in renviament a bucca u en scrit sco era chastis, ordinar lavurs spezialas u decretar in'exclusiun da la classa en l'atgna chasa da scola fin a dus mezs dis per cas.

³ Il manader da scola po ordinar lavurs en chasa da scola, lavurs spezialas u in'exclusiun da la classa fin a diesch mezs dis per cas.

⁴ Exclusiuns da scola succedan sin fundament d'ina decisiun da la direcziun da la scola e ston ademplir las prescripziuns legalas tenor art. 9.

Art. 12 Recurs

¹ Cunter decisiuns dal manader da scola pon ins far recurs entaifer diesch dis a la direcziun da la scola.

² Cunter decisiuns da la direcziun da la scola pon ins far recurs entaifer diesch dis a la cumissiun da furnaziun.

³ Il recurs cunter decisiuns da la cumissiun da furnaziun sa drizza tenor il dretg chantunal.

Art. 13 Disposiziun finala

Quest urden disciplinar entra en vigur il 1. d'avust 2015. El remplazza la versiun vertenta dals 19 da schaner 2007.

Decidi da la direcziun da la Scola da la citad da Cuir il 24 d'avust 2015.